

Ekap karâmbuŋ Yohaneŋâ kulemguip.

Umâlep den.

¹Yesugât kâmurân gâbâ a sâtŋâ nâ, bukunâ Gaio, gâgât ekap zi kulemguan. Nâ gâgât perâkŋak otnimap.

²Bukunâ, umgâ Kembangâren pâna âlip op ziap, zo yatik sâkkâ âlip oi ândibangât ninâu sâman. ³Gâ den bonŋâ mem lumat. Bukurâpkâ nâmbutŋâ zen ga den siŋgi zo dâtnone nâŋgâm umnâ âlip uap. ⁴Nan bârarâpnâ zen den bonŋangât mâtâp lânme. Den zo yatâ nâŋgâm umâlep patâ ŋâi nâŋgâman.

Kembangât nep a hurat kwatziŋgâban.

⁵Bukunâ, gâ buku otziŋgâmat. Oi kamân goorânâk buŋâ, kârebân gâbâ gane buku otziŋgâmat. Zo âlip opmat. ⁶A zen ziren Yesugât kâmut minduminduyân orot mâmegangât sâm âlip kwatgiwe. A gâgâren ganetâ Anutu kutŋangât opŋâ buku otziŋgâmŋâ zâmbana âine âlip upap. ⁷Zen kutŋangât op Anutugât nebân âi ândie. Zen um kâtik zengâren ândim kât sikum mân mimegât betziŋan meindâ dâp upap. ⁸Yatâ buku otziŋgâm betziŋan meindâ den bonŋangât nep ârândâŋ tuunat.

Diotrepe zâk a buku mân otziŋgip.

⁹Nâ Yesugât kâmut zengât ekap ŋâi kulemguwan. Oi Diotrepe zâk zikŋangât a sâtŋâ ândibat sâmŋâ dinnâ birâmap. ¹⁰Zorat opŋâ nâ zengâren gamŋâ ândi mâmanŋangât topŋâ sâm muyagibat. Zâk nengât sarâ sâm, sâm bâliŋ kwatniŋgâmap. Oi zorigâk buŋâ. Bukurâpniŋâ nâmbutŋâ zengâren ganetâ zâk mân buku otziŋgâmŋâ a nâmbutŋandâ buku otziŋgâne mân upigât sâm kâmurân gâbâ moliziŋgi sâkŋangât siŋgi upme.

Demeterio zâkkât nâŋgâne âlip oip.

¹¹Bukunâ, gâ a ziŋâ kut ŋâi bâliŋâ utnetâ zengât mâtâp mân lânban. ŋâi zâk kut ŋâi ŋâi âlipŋâ opmap, zâk Anutugâren gokŋâ. Ka ŋâi zâk kut ŋâi ŋâi bâliŋâ opmap, zâk Anutu mân ek nâŋgâmap sâsâŋ.

¹²Demeterio zâkkât topŋâ a aksik patâ ziŋ sâŋ muyagiwe. Zâk a âlipŋâ op ândiap. Zâk Kembangât den bonŋâ mem ândimap. Orot mâmeŋandâ topŋâ sapsuŋap. Oi nen yatik zâkkât sâŋ âlip kwâkŋaŋgâmen. Oi den bonŋâ sâmen, zo âlip nâŋgâmat.

Den murukŋâ.

¹³Den doŋbep ziap. Oi simbupŋâ kulemgubatkât mân otnigap. ¹⁴Nâ gâgâren kek gâbatkât san. Gandâ den sâŋ âragurat.

¹⁵Um lumbe gâgâren zimbap. Bukuniŋâ zen nâŋgâgige. Nâ yatigâk bukurâpniŋâ gâgâren ândie, zen nâŋgâziŋgan. Zorat dâzâŋgoban. Zo yatik.